



Minggu, 24 Nopember 2024

**Ogen: Kejadian 31:14-16**



**Ngikutken Perbulangen**



**P**erjabun e sada ingan man sekalak dilaki ras diberu nggeluh ersada ras ngaturken geluh ras masa depanna. I je me sura-sura, rencana rikut dahin bage pe geluhna duana iatur dengen idalanina alu mehuli. Umumna kerina masyarakat rikut budaya manusia mpejayo jabu-jabu e. Duana nadingken nande bapana, e maka ersada ia. Masyarakat patriarki megati ikataken sekalak ndehara ngikutken perbulangenna. Aminna i bas paksa genduari enda, duana nge nadingken orangtua janah duana nge ia alu pegancihen banci ngaturken kegeluhen alu arih-arih.

Jabu Jakub sedekah enda ringan ras mamana Laban. Kenca 1 tahun ia erdahin guna ndatken Lea ras Rahel, Jakub pe erdahin denga ras mamana alu ngaloken upah. Tapi piga-piga kali ibuali Laban si Jakub. E maka keputusan Jakub maba keluargana lawes dengen mulih ku Kanaan ku taneh orangtuana. Kerina pengalamen Jakub sedekah ras Laban iturikenna man ndeharana janah sura-sura guna lawes nadingken mamana pe ikatakenna. I bas si e Lea ras Rahel ndeharana ersada ukur ras sada kata maka duana ia ngikutken perbulangenna. Sabap selaku anak diberu lanai lit baginna i bas jabu bapana. Ia desken kalak tandang sabap sepuluh empat tahun Jakub erdahin jadi tukur ndeharana janah enggo ikerikenna tukur e. Bage me ndehara meteh inganna e me ras perbulangenna, lanai i bas jabu bapana. Kegeluhen jabu enda pe jadi gambaren man banta, dilaki ras diberu nadingken nande bapana dengen jadi kalak si mandiri guna ngaturken jabuna. Apai ka budayanta maka ndehara ngikutken perbulangenna. Perlu kal meteh kegeluhen jabu lanai banci iatur kalak sideban ntah pe orang ke tiga, gelah kai pe keputusan si ibahan guna kiniulin jabu, e me keputusenna duana dengen ertanggungjabap nandangi geluhna.